



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola VIII. Ioannis Papae VIII. Ad Carolvm Calvvm Imperatorem.
Imperatoris precibus, cum Burdigalensis prouincia a paganis esset
deuastata, Frotarium Burdigalensem archiepiscopum transfert in ...

urn:nbn:de:hbz:466:1-15967

amplius remanere, nisi ut nobis a vobis desperatis dimissis, vobis etiam ab hac sancta ecclesia nulla spes ultra remaneat. Porro si in presentis necessitate nobis aptum & sufficiens praeberitis auxilium, & nihil differentes, populo Dei, beato Petro speciali prerogativa commisso, subuenire studueritis; scitote in omni opportunitate vestra tanto nos fore promptiores, quanto fuerimus redditi ab hoste securiores. Ceterum dilectionem tuam miramur legatos nostros retinuisse, Leonem episcopum carissimum nepotem nostrum apocrisarium & missum apostolicae sedis, atque Petrum aequae episcopum, qui cum festinantes vos ad diuinitus protectum Augustum mitterentur, a vobis & tunc detenti sunt, & modo nihilo minus non merito retinentur. Quod quia contra decus apostolicae sedis, quod nunquam factum est, profecto non dimitemus, cum hinc certi fuerimus, inultum. Cum enim nos illos pro multiplicibus ecclesiae nostrae necessitatibus sub nimia festinatione miserimus; a vobis, quem hoc non latet, non impediri, sed ad id celerius agendum vestris, sicut credidimus, potius debuere fulciri subsidiis. Data
ut supra.

EPISTOLA VIII.

IOANNIS PAPAE VIII.

AD CAROLVM CALVVM IMPERATOREM.

Imperatoris precibus, cum Burdigalensis prouincia a paganis esset deuastata, Frotarium Burdigalensem archiepiscopum transfert in ecclesiam Bituricensem.

Ioannes episcopus Carolo imperatori.

PETITIONEM vestram, filiorum carissime, quam non abnegando sed dispensando dudum distulimus, nunc nos ad votum nostrum ob id vel maxime, Christo praeduce, perduxisse gaudemus: quod & vestram gloriam perseverantem testificatricem cognouimus, & prouincialium praesulum consentaneas probationes probauimus, & legatorum nostrorum subtilissimas disquisitiones aduertimus. Quocirca, licet nos multis canonicis testimoniis prouocati petitionem vestrae deuotionis implere magnopere moliremur, & solius maiestatis vestrae

Concil. Tom. 24.

B ij

testimonio super exterminio Burdigalensis prouinciæ credere minime cunctaremur: tamen quia pietatis vestræ testimonio comprouincialium quoque præfulum literas conuenire, sicuti rebamur, nuper cognouimus, secundum pietatis vestræ religiosissimum libitum, Burdigalensis diœcesis episcopum, fratrem scilicet nostrum Frotarium in Bituricensem ecclesiam cardinalem fieri decernentes, metropolitana dignitatis priuilegio iterato munire curauimus; & studii vestri solertiam, quo semper idoneos ecclesiæ viros quadam naturalis ingenii nobilitate deligitis, admirantes, congruas literas, his quorum interest, ex auctoritate sedis nostræ direximus, atque magnanimitatem vestram, quam istius religiosi negotii circa nos incentricem cognouimus, eam nihilo minus executricem fore nec immerito delegamus. Quatenus propter Deum, cuius Filii precioso sanguine tota per mundum redempta consistit ecclesia, sic istius necessariæ dispensationis instituta custodiat, vt a paternis regulis constitutis antiquitus in parte altera nunquam omnino discedat. Præterea, quod filiolarum vestræ petit industria, vt quorum suggestionibus dudum vestra sit dilata petitio detegamus, omnino sciatis, quia nos licet indigni simus, tamen quoniam per consequentiam priorum nostrorum pontificum maturo cogimur esse iudicio, causam tantæ deliberationis ideo non facile tunc deliberandam credidimus, ne diffinisse, quod Deus auerterit, minus ordinabiliter videremur. At postquam Deus omnipotens petitionem serenitatis vestræ comprouincialium præfulum testimonio decorauit, imo testimonia præfulum pietatis vestræ suffragio confirmauit, nos religiosam petitionem vestram compleuimus, & suggestionibus fratrum coepiscoporumque nostrorum manus porreximus, & ecclesiæ Dei tantis necessitatibus consulentes, de thesauro pontificalis pectoris ita vobis protulimus, vt a doctrinis deuiasse veteribus nullo modo videamur. Data, *vt supra.*